



Broj: /25
Goražde, 04.03.2025. godine

Na osnovu člana 50. stava 3. Zakona o zdravstvenom osiguranju („Službene novine Federacije BiH", broj: 30/97, 07/02, 70/08, 48/11, 36/18 i 61/22) i člana 19. Statuta Zavoda zdravstvenog osiguranja Bosansko-podrinjskog kantona Goražde („Službene novine BPK-a Goražde", broj: 6/16"), Upravni odbor Kantonalnog zavoda zdravstvenog osiguranja Goražde, na svojoj 8 (osmoj) redovnoj sjednici održanoj dana 04.03.2025.godine, donosi:

PRAVILNIK

o uslovima, načinu korištenja i visini naknade troškova prijevoza sanitetskim vozilom

DIO PRVI - OSNOVNE ODREDBE

Član 1 . (Predmet)

- (1) Ovim Pravilnikom utvrđuju se uslovi, način korištenja i visina naknade troškova prijevoza sanitetskim vozilom osiguranih osoba Zavoda zdravstvenog osiguranja Bosansko-podrinjskog kantona Goražde (u daljnjem tekstu: osigurana osoba) na teret sredstava Zavoda zdravstvenog osiguranja Bosansko-podrinjskog kantona Goražde (u daljnjem tekstu: Zavod).
- (2) Pod sanitetskim prijevozom iz stava (1) ovoga člana podrazumijeva se prijevoz u ili iz zdravstvene ustanove u svrhu pružanja zdravstvenih usluga osiguranim osobama, vozilom koje je posebno opremljeno za prijevoz bolesnika i povrijeđenih.
- (3) Prijevoz vozilom hitne medicinske pomoći se ne smatra prijevozom u smislu odredbi ovog Pravilnika.

DIO DRUGI - PRAVO I USLOVI ZA SANITETSKI PRIJEVOZ

Član 2. (Pravo na sanitetski prijevoz)

- (1) Pravo na sanitetski prijevoz ima osigurana osoba koja je s obzirom na medicinske indikacije nepokretna, teško pokretna ili kojima je indiciran neophodan prijevoz sanitetskim vozilom zbog njihovog opšteg zdravstvenog stanja., odnosno istoj je tokom prijevoza neophodan nadzor stručnog osoblja, a koja ispunjava uslove ostvarivanja prava na prijevoz sanitetskim vozilom iz člana 3. ovog Pravilnika.
- (2) Sanitetski prijevoz se osigurava ukoliko bi transport bilo kojim drugim prijevoznim sredstvom, koje nema posebnu opremu i stručni tim, mogao ugroziti život i zdravlje pacijenta, a koji kumulativno ispunjava uvjete iz člana 3. ovog Pravilnika.

Član 3.
(Uslovi ostvarivanja prava na prijevoz sanitetskim vozilom)

Pravo na prijevoz sanitetskim vozilom ima osigurana osoba Zavoda ukoliko su ispunjeni slijedeći uslovi:

a) udatjenost od mjesta polaska do mjesta najbližeg doktora medicine, odnosno zdravstvene ustanove veća od 40 km i

b) kada je osigurana osoba upućena na liječenje van BPK-a Goražde, odnosno na medicinsku rehabilitaciju i fizikalnu terapiju van BPK-a Goražde u drugu zdravstvenu ustanovu na osnovu:

1) odluke komisije Zavoda za upućivanje osiguranih osoba na liječenje van kantona,

2) odluke komisije Zavoda za upućivanje osiguranih osoba na liječenje medicinskom rehabilitacijom i fizikalnu terapiju van BPK-a Goražde

3) saglasnosti komisije za davanje saglasnosti za liječenje osiguranih osoba Zavoda na teret sredstava Federatnog fonda solidarnosti, izuzev troškova prijevoza usluga dijalize.

4) odluke za sanitetski prijevoz

DIO TREĆI - POSTUPAK OSTVARIVANJA PRAVA NA SANITETSKI PRIJEVOZ

Član 4.
(Prijedlog sanitetskog prijevoza)

(1) Prijedlog za odobrenje odgovarajućeg sanitetskog prijevoza, odnosno posebnih uslova prijevoza osigurane osobe u zdravstvenu ustanovu, utvrđuje doktor medicine ugovorene zdravstvene ustanove u Bosansko-podrinjskom kantonu Goražde (u datnjem tekstu: doktor medicine), koji predlaže upućivanje na liječenje u drugu zdravstvenu ustanovu na osnovu odredaba člana 3. tačka b) podtačkama 1), 2), 3), 4) i isti dostavlja nadležnoj komisiji Zavoda.

(2) Zdravstvena ustanova u koju je osigurana osoba upućena na liječenje van BPK-a Goražde, odnosno na medicinsku rehabilitaciju i fizikalnu terapiju van BPK-a Goražde, prijedlog za odobrenje odgovarajućeg sanitetskog prijevoza, odnosno posebnih uslova prijevoza osigurane osobe, pri povratku iz zdravstvene ustanove, dostavlja direktno Zavodu.

(3) Ukoliko zdravstvena ustanova primarne zdravstvene zaštite iz stava (2) ovog člana prijedlog za odobrenje odgovarajućeg sanitetskog prijevoza dostavi direktno ugovorenoj zdravstvenoj ustanovi na području BPK-a Goražde, ista je u obavezi u roku 24 sata proslijediti predmetni prijedlog nadležnoj komisiji Zavoda na rješavanje.

Član 5.
(Saglasnost za sanitetski prijevoz)

(1) Na osnovu Mišljenja o potrebi prijevoza za odobrenje odgovarajućeg sanitetskog prijevoza, odnosno posebnih uslova prijevoza osigurane osobe, nadležna komisija odobrava prijevoz izdavanjem „Odluke za sanitetski prijevoz,,,

Za osiguranike-onkološke pacijente Odluka za sanitetski prevoz važi za cijeli period liječenja počev od datuma izdavanja saglasnosti Federalnog fonda zavoda zdravstvenog osiguranja i reosiguranja FBiH pa do završetka liječenja.

(2) Ukoliko nadležna komisija Zavoda nije odobrila osiguranoj osobi pravo na sanitetski prijevoz, izdaje Odluku sa dodatnim obrazloženjem.

(3) Osigurana osoba Zavoda koja je nezadovoljna odlukom nadležne komisije Zavoda ima pravo uložiti žalbu na Odluku iz člana 5. stava (3) ovog pravilnika, u skladu s poukom o pravnom lijeku.

(4) U Drugostepenom postupku nadležna Komisija za prava osiguranika i kontrolu lijekova donosi preporuku i mišljenje Upravnom odboru.

Član 6. **(Nadležnost za sanitetski prijevoz)**

Sanitetski prijevoz, u pravilu, osigurava ugovorna zdravstvena ustanova primarne zdravstvene zaštite prema mjestu prebivališta osigurane osobe.

Član 7. **(Visina naknade sanitetskog prijevoza)**

Zdravstvenoj ustanovi primarne zdravstvene zaštite na području Bosansko-podrinjskog kantona Goražde koja obavi prevoz sanitetom, priznavat će se i plaćati ukupan iznos troškova po jednom obavljenom prevozu.

Iznos visine naknade troškova sanitetskog prijevoza utvrđuje se u visini 30% od cijene jedne litre goriva za sanitetsko vozilo po pređenom kilometru i dnevnice vozača u iznosu od 25,00 KM.

Član 8. **(Propisana dokumentacija)**

(1) Ugovorena zdravstvena ustanova primarne zdravstvene zaštite, nakon obavljenog sanitetskog prijevoza, dostavlja slijedeću dokumentaciju: fakturu, putni nalog zdravstvene ustanove, saglasnosti komisije za davanje saglasnosti za liječenje osiguranih osoba Zavoda na teret sredstava Federatnog fonda solidarnosti, Odluku za sanitetski prijevoz, Odluku komisije za liječenje van kantona i nalaz.

Član 9. **(Postupanje po zahtjevu osigurane osobe)**

(1) Zavod ne pokriva troškove sanitetskog prijevoza po zahtjevu osigurane osobe i u slučaju kada se osigurana osoba može sigurno prevesti na drugi način.

(2) Troškove sanitetskog prijevoza u slučaju iz stavka (1) ovog člana plaća osigurana osoba.

Član 10. **(Putni troškovi)**

Korištenje usluga prijevoza sanitetskim vozilom na osnovu izdanog Naloga za sanitetski prijevoz isključuje naknadu putnih troškova osiguranoj osobi i pratitelju osigurane osobe.

DIO ČETVRTI – ZAVRŠNE ODREDBE

Član 11.

Ovaj Pravilnik stupa na snagu danom donošenja i bit će objavljen na web stranici Zavoda.

Danom primjene ovog Pravilnika stavlja se van snage Zaključak upravnog odbora, broj: 08-04-4-1722-6/24 od 15.11.2024. godine.

Danom primjene ovog Pravilnika stavlja se van snage Odluku o visini naknade sanitetskog prijevoza, broj: 01-02-3-2654-3/23 od 29.12.2023. godine.

Dostavljeno:

- Rukovodiocima sektora
- Zdravstvenim ustanovama sa područja BPK-a
- a/a

**PREDSJEDNIK
UPRAVNOG ODBORA**

Enver Ratković